

Quityi nu nguscua San Pablo tya clyo cha' ndyaa ca slo Timoteo

1 Pablo laca na'. Sca ñat̃i nu ndya'a nchcui' cha' j̃i' Jesucristo nde xa' quich̃i laca na', cha' ycui' Ndyosi nu ndu'ni lyaá j̃i' ñat̃i ngulo cña jna' cha' cua'ni na' cña bi'; ngulo Jesucristo cña jna', la cui' nu Cristo nu ndu' ti' na j̃i' cha' tyaa Ni chaca quiya'. ²Nscua na' quityi re cha' caa slo nu'u, Timoteo, cha' ñi'ya si laca nu'u sñi' na', jua'a nti' na' ña'a na' jinu'u, cha' ngusñi nu'u cha' j̃i' Jesucristo tya lo'o ngulu'u na' cha' bi' jinu'u. Ndi'ya nti' na', cha' ña'a ti cua'ni ycui' Ndyosi Sti na cha' tso'o lo'o nu'u, cha' cua'ni tya'na ti' Ni jinu'u, cha' jua'a cua'ni Ni cha' ti' ti' cresiya jinu'u xqui'ya Jesucristo nu Xu'na na.

Ná tso'o cha' jly'a ti' ngu' cuentyu ti

³Lo'o cua tsa'a ti na' ca Macedonia, li' cua nchcui' na' lo'o nu'u cha' tyanu nu'u nde quich̃i Efeso; chaca quiya' chcui' na' lo'o nu'u juani, cha' tyanu nu'u ca quich̃i bi'. Ntsu'u ngu' quich̃i Efeso nu nclu'u xa' lo cha' j̃i' ngu' tya'a na; nga'a cha' culo nu'u cña j̃i' ngu' bi', cha' nga'aa culu'u tsa ngu' xa' la cha' j̃i' tya'a ngu'. ⁴Lo'o jua'a culo

nu'u cña cha' nga'aa ca tsa'a ngu' cuentyu cusu', nga'aa cua'a jyaca ngu' j̃i' cña cua' nu ndyanu j̃i' jyo'o cusu' j̃i' ngu' sa'ni. Nguich̃i tsa cha' bi', lo'o jua'a ná tye chca cha' bi' tsiya' ti. Ná xtyucua cha' bi' j̃i' na cha' cua'ni na cña j̃i' ycui' Ndyosi; sca ti si xñi na cha' j̃i' ycui' Jesús, li' caca cua'ni na cña j̃i' Ni.

⁵Culo nu'u cña j̃i' ngu' cha' tso'o tsa tyu'u tyiquee ngu' ña'a ngu' j̃i' tya'a ngu', cha' bi' laca cña nu ndu'ni ñat̃i nu ngua lubii cresiya j̃i' cuentya j̃i' ycui' Ndyosi; jlo ti' ñat̃i bi' ñi'ya laca cña tso'o, lo'o jua'a ndyu'ni ngu' bi' cña tso'o bi' li'. Chañi cha' ngusñi ngu' bi' cha' j̃i' ycui' Ndyosi si ntsu'u tyiquee ngu' ña'a ngu' j̃i' tya'a ngu'. ⁶Pana ntsu'u xi xa' la ñat̃i nu ná ntaja'a ngu' cuna ngu' cha' bi'; xa' tyucuii ngusñi ngu' bi', cha' nchcui' tsa ngu' cuentyu. ⁷Mstru caca ngu' bi', nti' ngu', ngu' nu nclu'u ñi'ya cña nu ngulo ycui' Ndyosi j̃i' ñat̃i, nu nguscua jyo'o Moisés; pana ná nda ngu' bi' cuentya ñi'ya ndyu'u cha' nu nchcui' ycui' ca ngu', ñi'ya ndyu'u cha' nu nda cha' cusu' bi', masi lye tsa nclu'u ngu' cha' bi' j̃i' tya'a ñat̃i ngu'.

⁸Jlo ti' na cha' tso'o tsa cha' cusu' nu nguscua jyo'o Moisés bi', si taquiya' na ji'i. ⁹Pana si'i xqui'ya ñati nu tso'o tyiquee nda ycu'i Ndyosi cha' cusu' bi'; na cuna nda Ni cha' bi' xqui'ya ñati nu ná nti' cua'ni cha' tso'o, xqui'ya ñati nu ná ntaja'a taquiya' ji'i cha' bi', xqui'ya ñati nu ná ntsu'u cha' ji'i lo'o ycu'i Ndyosi, xqui'ya ñati nu ntsu'u qui'ya ji'i, xqui'ya ñati nu cuxi tyiquee, xqui'ya ñati nu nchcui' suba' ji'i ycu'i Ndyosi, xqui'ya ñati nu ndujuii ji'i sti ngu', ji'i xtya'a ngu', xqui'ya ñati nu ndujuii ji'i tya'a ñati, ¹⁰xqui'ya ñati nu ndu'ni suba' lo'o nu cuna'a, xqui'ya nu cuna'a nu ndu'ni suba' lo'o nu qui'yu, xqui'ya nu qui'yu nu ndu'ni suba' lo'o tya'a qui'yu ti, xqui'ya ñati nu ntucuaana ji'i tya'a ñati cha' tsalo'o ji'i ngu' jua'a ti, xqui'ya nu cuiñi, xqui'ya ñati nu nchcui' cha' cuiñi slo ngu' tisiya. Nda ycu'i Ndyosi cha' cusu' bi', cha' jua'a ca cuayá' ti' lcaa ñati nu ná nti' taquiya' ji'i cua ña'a ca cha' nu liñi ca nu nclu'u na cuentya ji'i ycu'i Ndyosi. ¹¹La cui' cha' tso'o bi' nclu'u na' chacuayá' ji'i ycu'i Ndyosi juani, lo'o nclu'u na' cha' tlyu tsa laca ycu'i Ndyosi, cha' tso'o tsa ntsu'u tyiquee Ni ña'a Ni ji'na.

Tso'o tsa ndu'ni ycu'i Ndyosi lo'o na

¹²Ndya tsa na' xlya'be ji'i Jesucristo nu Xu'na na cha' ngua'ni Ni cha' caca cua'ni na' cña ji'i Ni; ndya na' xlya'be ji'i Ni cha' ngusubi Ni jna' cha' cua'ni na' cña ji'i Ni, cha' jlo ti' Ni cha' ndaquiya' na' ji'i Ni. ¹³Ngusubi Ni jna', masi suba' tsa nchcui' na' ji'i Ni cua sa'ni la,

tyempo lo'o ngxucube' na' ji'i ñati ji'i Jesucristo; tyaala tsa na' nu ngua li'. Pana ná jlo ti' na' tyempo bi', cha' bilya xñi na' cha' tso'o ji'i ycu'i Ndyosi, bi' cha' ngua tya'na tsa ti' Ni jna'. ¹⁴Ntsu'u tsa tyiquee nu Xu'na na ña'a Ni 'na, bi' cha' ngusñi na' cha' ji'i ycu'i Jesucristo li'; lo'o nu juani ntsu'u tyiquee na' ña'a na' ji'i Jesús, lo'o jua'a ntsu'u tyiquee na' ña'a na' ji'i tya'a ñati na'.

¹⁵Taca xñi tso'o ngu' cha' nu nchcui' ndi'ya: Cua yaa Jesucristo nde chalyuu cha' cua'ni lyaá Ni ji'i ñati chalyuu nu ntsu'u qui'ya ji'i. Lo'o na', tlyu la xqui'ya na' que xa' la ñati, cha' cuxi tsa cña nu ngua'ni na' lo'o ñati ji'i Jesucristo nu ngua sa'ni la. ¹⁶Ngüi'ya tsa Jesucristo cha' clyu ti' 'na lo'o ngüityi Ni qui'ya nu ntsu'u 'na, cha' culu'u ycu'i Ndyosi ji'i xa' la ñati ñi'ya caca xñi ngu' cha' ji'i Ni. Ñi'ya lo'o tya'na ti' Jesús jna' tya clyo, jua'a ca tya'na ti' Ni ji'i lcaa ñati nu xñi cha' ji'i Jesús ca nde loo la, cha' si jlyu ti' ngu' ji'i Ni, ná nga'a cha' tye chalyuu ji'i ngu' li'. ¹⁷Bi' cha' cua'ni tlyu na' ji'i ycu'i Ndyosi juani, cua'ni chi na' loo Ni, cha' ná tye tsá nu laca Ni loo tyucui ña'a chalyuu; ná tye cha' ji'i ycu'i Ndyosi, cha' ná ntsu'u cha' cajaa Ni. Ná nchca ji'na ña'a na' ji'i Ni cha' laca na' ñati chalyuu ti, pana sca ti ycu'i Ni laca ycu'i Ndyosi. Jua'a laca cha' ji'i Ni tu'ni.

¹⁸Culo na' cña jinu'u juani, Timoteo, cha' ñi'ya nti' na' ña'a na' ji'i sca sñi' na', jua'a nti' na' ña'a na' jinu'u: Tya cua'ni la nu'u cña ji'i ycu'i Ndyosi ñi'ya nu cua nacui ngu' nu laca tu'ba ji'i ycu'i Ni cha'

cua'ni nu'u; tyi'u ti' nu'u cha' nu
 cua nchcui' ngu' bi' jinu'u tya tsubi'
 la, cha' caca nguula la ti' tyiquee
 nu'u. Li' ñi'ya caca ji'i sca sendaru
 tso'o, jua'a taca jinu'u xuu tya'a lo'o
 nu cuxi nu ntsu'u chalyuu; ¹⁹taca
 xuu tya'a nu'u lo'o nu cuxi bi' si
 xñi tso'o nu'u cha' ji'i Jesucristo,
 si xcui' cha' tso'o cua'ni nu'u lo'o
 ñati. Ntsu'u ngu' nu ngua jlo ti'
 ñi'ya laca sca cha' liñi, pana nga'aa
 ndyu'ni ngu' cha' liñi bi' juani; cua
 ndya'achu' ngu' bi' ji'i ycu' Ndyosi,
 cha' nguxtyanu ngu' cha' tso'o bi'.
²⁰Ñi'ya nti' yu Himeneo lo'o yu
 Alejandro ni, nga'aa ndaquiya' ngu'
 ji'i cha' liñi, bi' cha' cua nguxtyanu
 na' ji'i ngu' bi' ya' nu xña'a, cha'
 ca cuayá' ti' ngu' cha' tlyu tsa cha'
 cuxi laca lo'o nchcui' ngu' cha' suba'
 ji'i ycu' Ndyosi.

**Ndi'ya cua'ni na lo'o chcui'
 na lo'o ycu' Ndyosi**

2 Nga'a cha' chcui' na lo'o ycu'
 Ndyosi cuentya ji'i lcaa ñati
 chalyuu, nu lo'o jña na cha' ji'i Ni,
 lcaa cha' nu lyiji ji'i ñati; chcui' na
 cuentya ji'i xa' ñati lo'o nchcui' na
 lo'o ycu' nu Xu'na na, jua'a lo'o tya
 na xlya'be ji'i ycu' Ndyosi cuentya
 ji'i ñati. ²Nga'a cha' chcui' na lo'o
 ycu' Ndyosi cuentya ji'i lcaa ngu'
 nu laca loo, cuentya ji'i lcaa ngu'
 nu laca cña; jña ma cha' cua'ni Ni
 cha' ti ti tyi'i tyiquee na, cha' ná xuu
 tya'a ngu' laca loo bi' lo'o na, cha'
 ta ngu' bi' chacuayá' cha' cua'ni na
 lcaa lo cha' tso'o, ñi'ya nu nti' ycu'
 Ndyosi cha' cua'ni na. ³Jua'a nti'
 ycu' Ndyosi nu ndu'ni lyaá ji'na;
 tso'o nti' Ni si jua'a chcui' na lo'o
 Ni, ⁴cha' nti' Ni cha' cua'ni lyaá Ni

ji'i lcaa ñati chalyuu, nti' Ni cha' ca
 cuayá' ti' lcaa ñati ñi'ya nu ntsu'u
 cha' liñi ji'i ycu' Ndyosi. ⁵Sca ti
 ycu' Ndyosi ntsu'u tsiya' ti, lo'o
 jua'a ntsu'u sca ti ñati nu ndi'i slo
 ycu' Ni nu nchcui' lo'o Ni cuentya
 ji'i ñati chalyuu; la cui' Jesucristo
 laca nu ñati bi'. ⁶Nda Jesucristo
 chacuayá' cha' ndyujuii ngu' ji'i yu
 cua tsubi' la; jua'a nda yu caya' lo
 qui'ya nu ntsu'u ji'i ñati chalyuu,
 nu lo'o ngujuii yu lo crusi. Ngua'ni
 ycu' Ndyosi cña bi' la cui' hora
 lo'o ngua ti' Ni cha' cua'ni Ni ji'i.
⁷Ngusubi Ni 'na cha' ndya'a na' nda
 na' cha' tso'o bi' lo'o ñati cuentya
 ji'i ycu' Ni, cha' lo'o ngu' xa' tsu'
 ndyuna ngu' cha' tso'o bi' li'; ndya'a
 na' ngulu'u na' ji'i ngu' ñi'ya caca
 xñi ngu' cha' ji'i ycu' Ndyosi. Cha'
 liñi nscua na' nde, si'i cha' cuiñi
 nchcui' na'.

⁸Bi' cha' lacua, lcaa se'i su
 ndyu'u ti'i ngu' nu ntsu'u cha' ji'i
 lo'o Jesucristo tsa tlyu ti, nti' na'
 cha' chcui' ngu' lo'o ycu' Ndyosi.
 Tso'o ti tyiquee ngu' ta ngu' cha'
 lo'o ycu' Ndyosi li', cha' ná tso'o
 chcui' ngu' lo'o Ni si ñasi' ngu', ni
 ná tso'o chcui' ngu' lo'o Ni laja
 lo'o nxuu tya'a ngu'. ⁹Lo'o nu ngu'
 cuna'a ni, cacu' ngu' ste' tso'o ti,
 si'i late' nu quiña'a tsa nga'a; ná
 talya' lye ngu' quicha' hique ngu',
 ná cacu' lye ngu' oro ni quee ndubi
 nu quiña'a tsa nga'a, cha' ná tso'o
 cha' cua'ni tyixi tsa ngu' ji'i ycu'
 ca ngu' cha' xña'a xa' nu qui'yu
 ji'i ngu' li'; ¹⁰tso'o la ña'a nu cuna'a
 nu xcui' cha' tso'o ndu'ni cuentya
 ji'i ycu' Ndyosi. ¹¹Nga'a cha' tyi'i ti
 ti ngu' cuna'a lo'o culu'u ngu' cha'
 ji'i ycu' Ndyosi laja lo'o ndyu'u

ti'i ngu', cha' lo'o ngu' cuna'a bi' ca tsa'a lo'o ngu', cha' lo'o ngu' cuna'a taquiya' ji'i cha' bi'. ¹²Ná ta na' chacuayá' ji'i sca nu cuna'a cha' culu'u cha' ji'i ycu'i' Ndyosi ji'i tya'a ngu' lo'o ndyu'u ti'i ngu' tsa tlyu ti, cha' ná tso'o si culo nu cuna'a cña ji'i nu qui'yu jua'a. Ti ti tyi'i ngu' cuna'a tso'o la. ¹³Nu ngua tya clyo ni, ngüiñá ycu'i' Ndyosi ji'i nu qui'yu Adán; tiya' la xi, li' ngüiñá Ni ji'i sca nu cuna'a nu ngua naa Eva. ¹⁴Lo'o jua'a si'i ji'i jyo'o Adán bi' ngua'ni nu xña'a ngana tyempo bi'; ji'i nu cuna'a ji'i yu ngua'ni bi' ngana, nu lo'o ngua'ni jyo'o Eva bi' cha' cuxi. ¹⁵Bi' cha' tlyu tsa cña ntsu'u ji'i ngu' cuna'a lo'o cala sñi' ngu' juani; pana cua'ni lyaá ycu'i' Ndyosi ji'i ngu' cuna'a si xñi tso'o ngu' cha' ji'i Ni, si ntsu'u tyiquee ngu' ña'a ngu' ji'i tya'a ngu'. Cua'ni Ni cha' ca lubii cresiya ji'i ngu' cuna'a bi', si talo ngu' cua'ni ngu' cha' tso'o bi', si nchca ji'i ngu' cuna'a bi' cua'a ji'i ycu'i' ca ngu' cha' ná ca tyucuaa ti' ngu' ji'i ñati.

**Ñati nu caca loo ji'i tya'a
ngusñi na cha' ji'i Jesús**

3 Nga'a cha' jlya tso'o ti' ma cha' liñi nu nchcui' ndi'ya: Tso'o tsa si tyaja'a sca ngu' tya'a ma caca loo ji'i ña'a taju ti ma nu ngusñi ma cha' ji'i ycu'i' Ndyosi, cha' tso'o tsa cuentya ji'i ycu'i' Ndyosi si nti' sca ñati cua'ni cña bi'. ²Si laca sca ñati loo ji'i ña'a taju tya'a ñati ji'i Jesucristo, li' ntsu'u cha' cua'ni yu xcu'i' cha' tso'o lo'o ñati, cha' ná caja ñi'ya jña ngu' qui'ya ji'i yu li'. Caja clyo'o yu bi' lo'o sca ti nu cuna'a; jua'a ntsu'u cha' culacua

tso'o ti' yu, cha' cua'a yu ji'i cha' cuxi nu ntsu'u tyiquee ycu'i' ca yu, cha' tso'o ti tyi'i yu lo'o tya'a ñati. Ntsu'u cha' ta yu ni'i ji'i yu lo'o jña ñati nu li'ya tyijyu', jua'a ntsu'u cha' ta yu na cacu ngu' bi'. Ntsu'u cha' culu'u yu cha' ji'i ycu'i' Ndyosi ji'i ñati, bi' cha' ná tso'o si ná nchca ji'i yu. ³Ná caca yu cña bi' si cu'bi yu, si xuu tya'a yu lo'o ñati; nga'a cha' talo tyiquee yu ji'i tya'a ñati yu, cha' ná caja tya'a cusuu yu. Ná tso'o cha' jña yu cñi ji'i tya'a ñati, cha' caca culiya' tsa ycu'i' ca yu. ⁴Ntsu'u cha' culo tso'o yu bi' cña ji'i ngu' tya'a ndi'i ti yu, cha' jua'a taquiya' sñi' yu cña nu nclyo yu ji'i ngu', cha' cua'ni chi sñi' yu loo yu. ⁵Ná caca ji'i sca ñati caca loo ji'i taju tya'a ñati ji'i ycu'i' Ndyosi si ná lo'o culo tso'o yu bi' cña to' tyi yu; ⁶bi' cha' ná tso'o caca loo sca ñati nu ngusñi ca ti cha' ji'i ycu'i' Ndyosi, cha' tya lyiji ca tsa'a tso'o yu. Ná tyiquee! lye tsa cua'ni tyucuaa ti' yu ji'i tya'a yu, lo'o li' ntsu'u cha' xcube' ycu'i' Ndyosi ji'i yu ñi'ya lo'o xcube' Ni ji'i nu xña'a. ⁷Nu ñati nu caca loo bi' ni, tso'o si caca yu sca ñati nu nchcui' ngu' quichi ji'i yu cha' tso'o ti ndu'ni yu, masi ngu' nu ná ndaquiya' cha' ji'i Jesucristo tsiya' ti chcu'i' ngu' jua'a ji'i yu. Lo'o li' ná caca chcu'i' ngu' cuentyu ji'i yu bi', ná caca cojolaqui nu xña'a ji'i yu bi', cha' cua'ni yu cha' cuxi.

**Ñati nu laca cña ji'i ngu' tya'a
ngusñi na cha' ji'i Jesús**

⁸Lo'o jua'a ñati nu laca cña ji'i ngu' tya'a ngusñi na cha' ji'i Jesús ni, lo'o ngu' bi' ntsu'u cha' cua'ni ngu' xcu'i' cha' tso'o. Ná tso'o si

tucua cha' ntsu'u tyiquee ngu' bi' lo'o ndu'ni ngu' cña bi'; ná tso'o si cu'bi ngu' bi', ni ná tso'o si jña ngu' bi' cñi jil'i tya'a ñati cha' caca culiya' tsa ycu' ca ngu'. ⁹Ntsu'u cha' xñi tso'o ngu' bi' leaa cha' liñi jil'i ycu' Ndyosi, tya'a cha' nu ngusñi leaa na, cha' jua'a tyucui tyiquee ngu' cua'ni ngu' xcui' cha' tso'o. ¹⁰Lo'o jua'a ntsu'u cha' cua'ni cuayá' ma jil'i ñati bi', cha' ña'a ma si xcui' cha' tso'o ndu'ni ngu'. Ñati nu ndu'ni tso'o ni, taca caca ngu' cña jil'i tya'a ngu' cha' xtyucua ngu' jil'i ña'a taju ngu' nu ngusñi cha' jil'i Jesús, cha' cuentya jil'i ycu' Ndyosi cua'ni ngu' bi' cña li'. ¹¹Lo'o nu ngu' cuna'a ni, ntsu'u cha' cua'ni ngu' xcui' cha' tso'o nu lo'o caca ngu' cña cha' xtyucua ngu' jil'i ña'a taju ngu' nu ngusñi cha' jil'i Jesús; ná tso'o cha' chcu' nu cuna'a bi' cuentyu jil'i tya'a ngu' lo'o xa' ñati. Nga'a cha' culacua tso'o ti' nu cuna'a bi', cha' talo jil'i cña nu nda ngu' jil'i. ¹²Ñati nu laca cña jil'i ña'a taju ngu' nu ngusñi cha' jil'i Jesús ni, caja clyo'o ñati bi' lo'o sca ti nu cuna'a; nga'a cha' culo tso'o ñati bi' cña jil'i sñi' ngu', cha' taquiya' tso'o leaa ñati nu ndi'i to' tyi ngu' cha' nu chcu' ngu' bi'. ¹³Lo'o jua'a tso'o tsa chcu' cua ña'a ca ñati jil'i ngu' bi' si tso'o ndu'ni ngu' cha' laca ngu' cña, cha' nxyucua ngu' jil'i ngu' tya'a na; li' tyatí la ti' ngu' jil'i Jesucristo, lo'o jua'a caca tlyu tyiquee ngu' cha' culu'u ngu' cha' liñi jil'i xa' ñati.

Ñi'ya laca cha' jil'i Jesús
nu cua ngusñi na

¹⁴⁻¹⁵Yala ti caa na' slo nu'u, nti' na'. Jua'a nta', pana ná jlo ti' na' ni

jacua' caca 'na, si ntsu'u nu tacu' tyucui jna'; bi' cha' juani nscua na' quityi re cha' caca cuayá' la ti' nu'u ñi'ya nga'a cha' cua'ni ñati jil'i Jesucristo lo'o tya'a ngu', ñi'ya nu ntsu'u cha' cua'ni ngu' lo'o ndyu'u ti'i ngu' tsa tlyu ti. Ndu'ni tlyu na jil'i ycu' Ndyosi nu lu'ú ca, leaa taju na lo'o tya'a na, lo'o jua'a nclu'u leaa ngu' tya'a na cha' liñi jil'i ycu' nu Xu'na na jil'i xa' ñati. Ná tye cha' liñi bi' tsiya' ti nde chalyuu xqui'ya leaa taju ngu' tya'a na li'. ¹⁶Chañi cha' tlyu tsa cha' tso'o jil'i Jesucristo nu ngusñi na. Ndi'ya nchcu' cha' bi':

Nu ngua sa'ni la ni, ni sca ñati ná ngua cuayá' ti' ñi'ya cua'ni lyaá ycu' Ndyosi jil'i ngu'; pana nu juani jlo ti' na, xqui'ya cha' ngula Jesucristo chalyuu, cha' ngua ycu' Ni sca ñati. Lo'o jua'a nchcu' Xtyi'i ycu' Ni cha' jil'i yu, cha' sca ñati nu lubii tsa laca yu; cua na'a xa jil'i ycu' Ndyosi jil'i Jesús, nu ñati lubii bi'. Li' nclyu'u ngu' cha' jil'i Jesucristo bi' jil'i ñati ca quiña'a tsa quichí tyucui ña'a chalyuu; ngusñi ñati leaa quichí cha' nu nchcu' ngu' jil'i Ni li'. Cua ndyaa Jesús ca slo ycu' Ndyosi Sti na nde cua, lo'o juani tlyu tsa laca Jesús cajua.

Tya'achu' ngu' jil'i cha' liñi
jil'i ycu' Ndyosi ca tiya' la

4 Xqui'ya Xtyi'i ycu' Ndyosi nchca cuayá' ti' na ñi'ya caca tyempo nde loo la, cha' ntsu'u ñati nu cua ngusñi tyucui jil'i Jesucristo

nquicha', lo'o li' tyu'utsu' ngu' bi' tyucuii ji'i ycu' nu Xu'na na. Xtyanu ñati bi' ji'i Ni li', cha' cñilo'o cui'i cuxi nu ndu'ni cña cuentya ji'i nu xña'a ji'i ngu'; tyijiloo cui'i cuxi bi' ji'i ngu' bi' li'. ²Ntsu'u ngu' nu nchcui' tucua lo cha', nu nga'aa ntyuju'u ti' cha' ngusñi ngu' cha' cuiñi nu nchcui' nu xña'a; ji'i ngu' cuiñi bi' cuna xi ngu' tya'a na, tyu'utsu' ngu' ji'i tyucuii tso'o li'. ³Nclu'u ngu' cuiñi bi' cha' ná tso'o caja clyo'o na; nclu'u ngu' cha' ntsu'u tsa na ndacu na nu ná tso'o cacu na, nacui' ngu' bi'. Tlyu tsa cha' cuiñi nu nda ngu' bi'. Pana ngüiñá ycu' Ndyosi lcaa na nu ndacu na cha' tso'o ti cacu na ji'i, lcaa tya'a na nu ntsu'u cha' ji'na lo'o Jesucristo; bi' cha' tya na xlya'be ji'i ycu' Ndyosi lo'o cua cacu ti na, cha' jlo ti' na cha' tso'o ji'i ycu' Ni. ⁴Tso'o tsa cña ngua'ni Ni, tso'o ngüiñá Ni lcaa lo na; bi' cha' ná tso'o si xcuaa na sca cha' tso'o nu ngüiñá Ni. Xñi na lcaa cha' tso'o bi', lo'o li' ndi'ya chcu' na lo'o ycu' Ndyosi: “Tsa xlya'be jinu'u, Ndyosi Sti ya”, ñacui' na. ⁵Jua'a chcu' na lo'o ycu' Ndyosi cha' nda Ni lcaa na nu tso'o cha' cacu na; culacua Ni ji'i lcaa na nu ndacu na li', cha' chacuayá' ji'i ycu' Ndyosi ndacu na ji'i.

**Ña'a ti cua'ni tso'o nu'u
cña ji'i ycu' Ndyosi**

⁶Culu'u nu'u lcaa cha' nu nscua na' lo quityi re ji'i ca ta'a ñati ji'i Jesucristo cajua, cha' caca nu'u sca ñati nu tso'o tsa ndu'ni cña ji'i Jesucristo, Timoteo. Tyi'u tso'o ti' nu'u lcaa cha' liñi nu cua ngusñi

nu'u, cha' ji'i ycu' Ni; ña'a ti xñi tso'o nu'u tyucuii ji'i ycu' nu Xu'na na li', ñi'ya nu ndyu'ni ti nu'u. ⁷Ná taquiya' nu'u ji'i cuentyu nu ná nchcui' cha' liñi ji'i ycu' Ndyosi, cha' cuxi tsa laca cha' bi'. Pana nu'u ni, ntsu'u cha' qui'i nu'u cha' cua'ni nu'u xcui' cña nu ndiya ti' ycu' Ndyosi. ⁸Tso'o xi cha' ngui'i quiya' na cha' tya'a na, ngui'i ya' na cha' cua'ni na cña; pana tso'o la si qui'i tyiquee na cha' taquiya' na ji'i ycu' Ndyosi lcaa tyempo. Tso'o ti tyi'i na nde chalyuu, nu lo'o cua'ni na cua ña'a ca cña nu nti' nu Xu'na na cha' cua'ni na; la cui' tso'o ti tyi'i na ca slo ycu' Ndyosi, si cua'ni na ñi'ya nu nti' Ni cha' cua'ni na. ⁹Chañi tsa cha' nu nscua na' nde, jua'a ntsu'u cha' xñi tso'o na cha' bi'. ¹⁰Jlya ti' na ji'i ycu' Ndyosi nu lu'ú ca; bi' cha' lye cua'ni na cña ji'i Ni, masi lya' tsa ti' ngu' ji'na. Lo'o ycu' Ndyosi ni, cua'ni lyaá Ni ji'i lcaa ñati si taquiya' ngu' ji'i Ni. Lo'o xñi na cha' ji'i Ni, li' ca cuayá' tso'o la ti' na cha' bi'.

¹¹Culo nu'u cña nu nguscua na' re ji'i lcaa ngu' tya'a ma, culu'u tso'o nu'u cha' bi' ji'i ngu'. ¹²Ná ta nu'u chacuayá' xtyí lo'o ngu' jinu'u cha' tya cuañi' nu'u, nti' ngu'. Cua'ni nu'u xcui' cña tso'o cha' ña'a lcaa tya'a ñati ji'i Jesucristo; xcui' cha' tso'o chcu' nu'u, xcui' cha' tso'o cua'ni nu'u, lo'o jua'a tso'o tsa tyu'u tyiquee nu'u ña'a nu'u ji'i xa' la ñati. Li' ca cuayá' ti' ngu' cha' tso'o tsa ngusñi nu'u cha' ji'i Jesucristo, xqui'ya cha' xcui' lubii ti cresiya jinu'u ndyu'ni nu'u cña. ¹³Laja lo'o tya lyiji ti tyalaa na' slo nu'u, ña'a ti tya chcu' nu'u lcaa cha' nu nscua

lo quityi ji'i ycu'i Ndyosi lo'o ngu'; tya chcu'i la nu'u ñi'ya laca cha' liñi bi', tya culu'u la nu'u cha' tso'o bi' ji'i ngu' tsa tlyu ti lo'o tyu'u ti'i ngu'.

¹⁴Na cua nda ycu'i Ndyosi tyucui chacuayá' ji'i Ni jinu'u lo'o ngusta ya' ngu' cusu' hique nu'u, cha' cua'ni nu'u cña cuentya ji'i ycu'i nu Xu'na na. Cua nchcu'i ngu' cuentya ji'i Xty'i ycu'i Ndyosi cha' cua'ni nu'u cña bi'; bi' cha' cui'ya tso'o nu'u cuentya ji'i cha' tso'o nu cua nda ycu'i Ndyosi jinu'u tsá bi', cha' talo nu'u ji'i cña nu ntsu'u jinu'u.

¹⁵Lo'o ycu'i nu'u ni, cui'ya tso'o nu'u cuentya ji'i lcaa cha' nu nguscua na' nde; li' ña'a ngu' cha' cua ndyaca tsa'a tso'o nu'u cha' caca nu'u loo ji'i ngu'. ¹⁶Talo nu'u ji'i cña bi'. Cua'a nu'u ji'i ycu'i ca cha' xcui' cha' tso'o ti cua'ni nu'u. Tso'o ti culu'u nu'u ji'i ngu' tya'a na, cha' jua'a cuna tso'o ngu' cha' nu nclu'u nu'u ji'i ngu', cha' cua'ni lyaá ycu'i Ndyosi ji'i ngu' bi' li'. Lo'o jua'a cua'ni lyaá Ni jinu'u li'.

Tso'o ti cua'ni na lo'o tya'a ngusñi na cha' ji'i Jesús

5 Ná cua'ni tyaala nu'u ji'i sca ngu' cusu' si ngua'ni cuxi yu; ta nu'u sca cuij lo'o yu ñi'ya lo'o nchcu'i na lo'o sti na. La cui' ti cha' lo'o nu ngu' qui'yu cuañi' ni, ta sca cuij lo'o ngu' ñi'ya lo'o nclu'u na ji'i tya'a na. ²Lo'o sca ma' cusu' ni, ta sca cuij lo'o ma' ñi'ya lo'o nchcu'i na lo'o xtya'a na; la cui' ti cha' lo'o nu ngu' cuna'a cuañi' ni, ta sca cuij lo'o ngu' ñi'ya lo'o nclu'u na ji'i sca nu cuna'a tya'a na. Pana xcui' lubii ti cresiya jinu'u ña'a nu'u ji'i ngu' bi'.

³Ntsu'u cha' ña'asii ngu' ji'i lcaa ngu' cuna'a ti'i si cua ngujui nu laca clyo'o ngu', si ndyanu ycu'i ti ngu'. ⁴Si ntsu'u sñi' nu cuna'a ti'i, masi sca sñi' ste', ntsu'u cha' ña'asii ngu' bi' ji'i xtya'a ngu' li'; nga'a cha' ca tsa'a sñi' ngu' cha' ña'asii ngu' ji'i ngu' cusu' ji'i, ñi'ya lo'o nguna'asii ngu' cusu' bi' ji'i sñi' ngu' lo'o ngua cuañi' ngu'. Bi' laca cña nu ndacui ji'i ngu' cuañi' cha' cua'ni ngu' cuentya ji'i ngu' cusu' ji'i, cha' tso'o ntsu'u tyiquee ycu'i Ndyosi lo'o ña'a Ni ji'i ngu' cuañi' nu ña'asii tso'o ji'i ngu' cusu' ji'i. ⁵Sca ti ji'i ycu'i Ndyosi ndu ti' ngu' cuna'a ti'i nu chañi cha' ndyanu ycu'i ti ngu'; sca ti ycu'i Ni xtyucua Ni ji'i ngu' nti' ngu', bi' cha' nchcu'i ngu' lo'o ycu'i Ndyosi tsá lo'o talya, ndijña ngu' ji'i Ni na ca nu lyiji ji'i ngu'. ⁶Si'i jua'a ndu'ni nu cuna'a ti'i nu ndyu'ni cua ña'a ca cha', ñi'ya nu nti' ti cresiya ji'i ycu'i ngu'; nti' ngu' cha' tso'o ti ndi'i ngu' chalyuu, pana cua tye ti cha' ji'i ngu' bi' cuentya ji'i ycu'i Ndyosi. ⁷Ntsu'u cha' culo nu'u cña ji'i lcaa ngu' bi', cha' ná caca sta xa' la ñati qui'ya ji'i cu'ma ñati ji'i Jesucristo xqui'ya ngu' cuna'a ti'i bi'. ⁸Ná tso'o ndu'ni ñati nu ná ndube ti' ji'i tya'a, masi ji'i sti ngu', masi ji'i xtya'a ngu', masi ji'i sñi' ngu'; cha' cuiñi nchcu'i ngu' lo'o nacui ngu' cha' ngusñi ngu' cha' ji'i Jesucristo si ná ña'asii ngu' ji'i tya'a ngu', cha' tso'o la ndyu'ni xa' ñati nu ná ndaquiya' cha' ji'i Jesucristo tsiya' ti.

⁹Tso'o la scua ngu' cusu' xtañi lcaa nu cuna'a ti'i nu cua ndye snayala yija ji'i, ma' cusu' nu sca ti quiya' ngujui clyo'o, nu sca ti lo'o clyo'o

ma' nguti'i ma' chalyuu. ¹⁰Scua ngu' xtañi ma' cusu' nu nchcui' ngu' jil'i cha' tso'o tsa cña ndu'ni ma' cusu' bi': si cua ngua'ni cu'ú tso'o ma' jil'i nu sube; si cua nda ma' su tyil'i ñati nu lijya tyijyu'; si cua nguxyucua ma' jil'i tya'a ñati jil'i Jesucristo, masi tlyu cña ntsu'u cha' cua'ni ma'; si ngua tya'na ti' ma' jil'i ñati nu quicha ti'. Si jua'a xcui' cña tso'o ndu'ni ma' cusu' bi', scua ngu' xtañi ma' lo quityi bi' lacua.

¹¹⁻¹²Ná scua ngu' xtañi nu cuna'a cuañi' la nu ndyanu ti'i, cha' ntsu'u quiya' ná talo nu ngu' cuañi' bi'. Pana nu cuna'a nu nscua xtañi lo quityi ni, sca ti cua'ni ngu' cña jil'i Jesucristo nti' ngu', bi' cha' ngüiñi cha' jil'i ngu' lo'o ycui' Ndyosi li'. Ñi'ya caca si tiya' la xa' caja clyo'o nu cuna'a cuañi' bi', lo'o li' nga'aa cua'ni ngu' ñi'ya nu nacui' ngu' cha' cua'ni ngu' cuentya jil'i Jesucristo li', jua'a ntsu'u qui'ya jil'i nu cuna'a bi' li'. ¹³Bi' cha' tso'o la si ná scua ngu' tsiya' ti xtañi nu cuna'a cuañi' nu ndyanu ti'i. Ná tyiquee' xcui' paseya ti tya'a ngu' cuañi' bi' slo ñati; pana si jua'a cua'ni ngu', caca taja ngu' cuna'a bi', chcui' tsa ngu' cuentyu jil'i xa' ñati li', masi jil'i tya'a ngu', masi jil'i xa' la ñati. Ni si'i sca ti cha' taja nu cuna'a ti'i nu ndu'ni jua'a, masi lo'o chcui' tsa ngu' cuna'a bi' lo'o tya'a ngu' lcau ti lo cha' nu ná tso'o cha' chcui' na. ¹⁴Bi' cha' tso'o la si xa' caja clyo'o nu cuna'a cuañi' nu ndyanu ti'i, nti' na'; caja sñi' ngu' li', ña'asii' ngu' to' tyi ycui' ngu', cha' ná caja ñi'ya nu sta ngu' qui'ya jil'na xqui'ya nu cuna'a bi'. ¹⁵Jua'a ntã' cha' cua'ni ma, cha' cua ntsu'u xi ngu' cuna'a cuañi' nu ndyanu ti'i nu cua ngulochu' jil'i cha' jil'i ycui'

Ndyosi, cha' cua ngusñi ngu' tyucui' jil'i Satanás nu xña'a li'.

¹⁶Culo nu'u cña jil'i ca ta'a ñati jil'i Jesucristo jua, masi jil'i ngu' qui'yu, masi jil'i ngu' cuna'a, cha' ña'asii' ngu' jil'i nu cuna'a ti'i tya'a ngu'; ná xtyanu ngu' jil'i nu cuna'a ti'i tya'a ngu' cha' caca bi' cuentya jil'i taju ñati jil'i Jesucristo. Li' caca xtyucua tyucui taju ngu' bi' jil'i nu cuna'a nu chañi cha' ti'i ngu', nu ngu' cuna'a ti'i nu ná ntsu'u ni sca ñati jil'i cha' xtyucua jil'i.

¹⁷Cua'ni chi' ma loo ngu' cusu' nu laca loo jil'i taju jil'i ma si tso'o ti ndu'ni ngu' lo'o ma. Lye la cua'ni chi' ma loo ngu' cusu' nu nchcui' cha' jil'i ycui' Ndyosi lo'o ma, ngu' cusu' nu nclu'u cha' bi' jil'i ma. Ta ma caya' jil'i ngu' cusu' bi'. ¹⁸La cui' ti cha' nscua lo quityi jil'i ycui' Ndyosi nu nchcui' ndi'ya: “Ná sca' ma tu'ba toro laja lo'o nxatá ni' jil'i trigo cha' tyu'u si'yu; cacu ni' xi, tso'o la li'”, nacui' quityi. Xa' nchcui' lo quityi bi' ndi'ya: “Liñi ndyu'u cha' xñi ngu' caya' lo cña nu ngua'ni ngu'”, nacui' quityi.

¹⁹Ná tucua' nu'u cha' jil'i ngu' si sta sca ñati qui'ya jil'i sca ngu' cusu' bi'; sca ti si stu'ba ti sta tucua sna tya'a ñati qui'ya bi' jil'i ngu' cusu' bi', li' nga'a cha' tucua' nu'u cha' jil'i ngu'. ²⁰Si chañi cha' ndyu'ni ngu' cusu' bi' cha' cuxi, li' chcui' nu'u lo'o nu cusu' bi' slo tyucui taju ñati jil'i Jesucristo bi', cha' cube ti' lcaa ngu', cha' ná cua'ni cuxi ngu' jua'a. ²¹Nclyo na' cña bi' jinu'u, Timoteo, cha' cua'ni nu'u lcaa cña nu nguscua na' lo quityi re; lo'o jua'a jlo ti' ycui' Ndyosi cha' nu nguscua na' re, jlo ti' Jesucristo, jlo

ti' xca nu ngusubi ycuil' Ndyosi jil'i. Nu lo'o ntsu'u cha' cua'ni cuayá' nu'u jil'i sca ngu' tya'a ma ni, jatya nu'u xi cha' ca cuayá' tso'o ti' nu'u lcaa lo cha' jil'i ngu' bi', cha' sca ti cuayá' liñi tyu'u cha' jil'i ngu' bi', masi tya'a tso'o nu'u, masi chaca tya'a ngu'. ²²Ná yala tsa cua'ni nu'u cha' sta ya' nu'u hichu' sca ñati, cha' caca yu loo jil'i sca taju ñati jil'i Jesucristo; jatya xi cha' ña'a si chañi cha' ñati nu xcuil' ndu'ni cha' tso'o laca yu, si chañi cha' tso'o tsa cña ndyu'ni yu, cha' ná tyanu qui'ya yu hichu' nu'u si ntsu'u cha' cuxi ne' cresiya jil'i yu bi'. Lo'o nu'u ni, xcuil' lubii ti cresiya jinu'u cua'ni nu'u cña.

²³Jlo ti' na' cha' quicha xi ti' nu'u; bi' cha' nga'aa co'o nu'u xcuil' hitya ti, tso'o co'o nu'u xi vino nu ndyu'u lo si'yu losu' cha' caca jo'o ne' nu'u.

²⁴Ntsu'u ñati nu ntsu'u qui'ya jil'i, pana jlo ti' xa' ñati ni cha' cuxi ndyu'ni ngu' bi', masi bilya caca cuayá' jil'i ngu' bi'. Lo'o jua'a ntsu'u ñati nu cuxi tyiquee ngu', pana ná jlo ti' xa' ñati ni cha' cuxi ndyu'ni ngu' bi'; lo'o caca cuayá' jil'i ngu' bi', hasta li' ca cuayá' ti' xa' ñati ñi'ya laca qui'ya nu ntsu'u jil'i ngu' bi'.

²⁵La cui' jua'a lo'o ñati nu tso'o tsa tyiquee, jlo ti' xa' ñati ni cha' tso'o nu ndyu'ni ngu' bi'. Pana si ntsu'u ñati nu tso'o tyiquee, nu ná jlo ti' xa' ñati jil'i, ca nde loo la tyu'u tucua cha', ca cuayá' ti' ngu' jil'i cha' tso'o nu ngua'ni ngu' bi' li'.

6 Lcaa ñati jil'i Jesucristo nu laca msu nu ngüi'ya ñati ntsu'u cha' cua'ni chi' ngu' loo xu'na ngu', masi ti'i tsa cña nu nda xu'na jil'i. Li' ná caca chcuil' cuxi ngu' jil'i

ycuil' Ndyosi xqui'ya msu bi', ni ná caca chcuil' cuxi ngu' jil'i cha' jil'i Jesucristo nu nclu'u na. ²Ñati nu laca msu nu cua ngüi'ya tya'a ñati jil'i Jesucristo sa'ni la ni, ná tso'o si cua'ni tyixi msu bi' lo'o xu'na ngu', cha' stu'ba ntsu'u tyiquee ngu' lo'o Jesucristo; ntsu'u cha' lye la cua'ni chi' msu bi' loo xu'na ngu', tso'o la cua'ni msu bi' cña jil'i xu'na ngu', cha' nu tya'a ngusñi ngu' cha' jil'i Jesús laca ngu' juani, lo'o jua'a ntsu'u tyiquee ngu' ña'a ngu' jil'i tya'a ngu'. Stu'ba ti ngusñi ngu' cha' jil'i Jesucristo, bi' cha' culu'u nu'u cha' bi' jil'i ngu', lo'o jua'a culo nu'u cña jil'i ngu' cha' cua'ni ngu' lcaa lo cha' nu nscua lo quityi re.

Ná culacua tsa ti' na cha' jil'i cñi

³Liñi tsa cha' jil'i ycuil' Jesucristo nu Xu'na na; cua ña'a ca ñati nu nclu'u xi xa' la cha' jil'i ma, ná liñi ndyu'ni nu ñati bi', ná ntaja'a ngu' tsiya' ti taquiya' ngu' jil'i cha' liñi bi'. ⁴Na nclu'u ngu' bi' xa' la cha' xqui'ya cha' ná jlo ti' ngu' bi' tsiya' ti, cha' tyixi tsa tyiquee ngu'. Ná tso'o tyiquee ngu' bi', cha' xcuil' na ndiya tsa ti' ngu' xu'u tya'a ngu' cuentya jil'i scaa cha' nu nchcuil' ngu'; ná tso'o cña nu ndu'ni ngu' bi', cha' jua'a caca liye' ti' ngu' jil'i tya'a ngu', lo'o jua'a xu'u tya'a ngu' bi' li', cha' xcuil' cuentyu chcuil' ngu' jil'i tya'a ngu', lo'o jua'a sta ngu' qui'ya laja ti jil'i tya'a ngu' li'. ⁵Lye tsa nchcuil' ngu' bi', xqui'ya cha' ná ngusñi tso'o ngu' cha' liñi jil'i ycuil' Ndyosi, jua'a nga'aa ncliyacua tso'o ti' ngu' bi'; cha' cuiñi ti ndu'ni tlyu ngu' bi' jil'i ycuil' Ndyosi cha' caja cñi jil'i ngu', nti' ngu'. Ná tya'a nu'u

stu'ba ti lo'o ngu' bi'. ⁶Chañi cha' ntsu'u xi cha' tso'o nu tyacua ji'na xqui'ya ycuí' Ndyosi, si cua'ni tlyu na ji'í Ni tyucui tyiquee na; pana sca ti si nguaala' ti' na lo'o lcaa cha' tso'o nu ntsu'u ji'na nde chalyuu. ⁷Ná sca na lo'o ji'na nu lo'o ngula na chalyuu, lo'o jua'a ná sca na tyalo'o na lo'o cajaa na. ⁸Cuayá' ji'na nde chalyuu si ntsu'u na cacu na, si ntsu'u ste' na; ⁹pana ntsu'u ñati' nu nti' tsa cha' caca culiya' ngu'. Ná tso'o cha' bi', cha' li' cua'ni cuayá' nu xña'a ji'í ngu' si caca tyu'u cha' cuxi tyiquee ngu'; tye chalyuu ji'í ngu' li', chcuna' cresiya ji'í ngu'. ¹⁰Lo'o ntsu'u tsa tyiquee ñati' ji'í cñi, bi' laca suu quiña'a tsa cha' cuxi. Ntsu'u ñati' nu tiji' tsa ti' ji'í cñi, bi' cha' cua ngulochu' ngu' cha' ji'í nu Xu'na na, cha' nga'aa taquiya' ngu' bi' cha' ji'í Ni. Xñi'í tsa ti' ndi'í ngu' bi' li', cha' nchcube' ngu' ji'í ycuí' ca ngu'.

**Tya nda Pablo xi cha'
lo'o yu Timoteo**

¹¹Lo'o nu'u Timoteo, ñati' ji'í ycuí' Ndyosi laca nu'u, bi' cha' xtyanu nu'u ji'í lcaa cha' cuxi bi'; xcuí' cha' liñi cua'ni nu'u, cua ña'a ca lo cha' tso'o nu nti' ycuí' Ndyosi cha' cua'ni na. Tya nxñi tso'o nu'u cha' ji'í ycuí' Ndyosi, jua'a cua'ni nu'u cha' tso'o tsa ntsu'u tyiquee nu'u ña'a nu'u ji'í lcaa ñati'; talo nu'u masi xcube' ngu' jinu'u, jua'a cua'ni tya'na ti' nu'u ji'í ñati'. ¹²Tyucui tyiquee nu'u cua'ni nu'u cña ji'í ycuí' nu Xu'na na, xqui'ya cha' ngusñi tso'o nu'u cha' ji'í Ni. Cua jlo ti' nu'u cha' ná nga'a cha' tye chalyuu jinu'u, cha' ngusubi ycuí' Ndyosi jinu'u,

lo'o li' cua nda nu'u cha' lo'o tyuu tya'a ñati' ñi'ya ngua lo'o ngusñi nu'u cha' ji'í Jesucristo; si'í sca cha' cuaana ti ngua bi'. ¹³Culo na' cña jinu'u juani chacuayá' ji'í ycuí' Ndyosi nu ndu'ni cu'ú ji'í lcaa na lu'ú nu ntsu'u chalyuu; la cui' jua'a culo na' cña jinu'u chacuayá' ji'í Jesucristo nu tso'o tsa nguxacui' cha' ji'í Poncio Pilato nu laca loo nu lo'o ngua cuayá' ji'í Jesús. Ná ntsii yu nguxacui' yu cha' cuentya ji'í cña nu ndyaca ji'í yu cha' nu sca ti Sñi' ycuí' Ndyosi laca yu. ¹⁴Culo na' cña jinu'u cha' xcuí' tso'o ti cua'ni nu'u, cha' cua'ni lyiji nu'u lcaa cha' nu nguscua na' lo quityi re, lo'o jua'a ná ta nu'u tyempo nu caja ñi'ya sta ngu' qui'ya jinu'u. Na ntajatya na ji'í Jesucristo nu Xu'na na ña'a cuayá' tyaa Ni chaca quiya', ¹⁵cha' tsá nu nti' ycuí' Ndyosi cha' caa Jesús, li' tyu'u tucua Ni chaca quiya'. Nu ycuí' Ndyosi ni, tso'o ntsu'u tyiquee Ni tyucui tyempo, lo'o jua'a ycuí' Ni laca loo tsiya' ti; laca Ni rey nu tlyu la, nu Xu'na nu laca loo la. ¹⁶Ná ntsu'u cha' cajaa ycuí' Ndyosi tsiya' ti, ná tye cha' ji'í Ni. Ndubi tsa ña'a xee ca su ntucua ycuí' Ndyosi, ni ná ntsu'u ñati' nu caca tsaa ca slo Ni jua'a ti xqui'ya xee tlyu bi'. La cui' jua'a ná ntsu'u ñati' nu cua na'a ji'í ycuí' Ndyosi, cha' ná nehca ña'a ñati' ji'í Ni nde chalyuu. Bi' cha' cua'ni chi' na loo ycuí' Ndyosi lacua, cha' laca Ni nu tlyu la. Jua'a laca cha' tu'ni.

¹⁷Lo'o jua'a ntsu'u cha' culo nu'u cña ji'í ngu' culiya' tya'a ngusñi ma' cha' ji'í Jesús, cha' ná cua'ni tyucuaa ti' ngu' bi' lo'o tya'a ngu'. Ná tso'o si xcuí' culacua tsa ti'

ngu' bi' ji'i cñi ji'i ngu'; la cui' ti ná culacua tsa ti' ngu' ji'i leaa cha' tso'o nu ntsu'u ji'i ngu', cha' yala ti ndye cñi ji'na. Tso'o la si cube ti' ngu' bi' ji'i ycui' Ndyosi nu lu'ú ca, cha' cua nda Ni leaa lo na nu ntsu'u ji'na cha' caca tso'o tyiquee na nde chalyuu. ¹⁸Culo nu'u cña ji'i ngu' culiya' bi' ndi'ya: Xcui' cha' tso'o cua'ni ngu'; cua'ni tya'na ti' ngu' ji'i xa' ñati, lo'o jua'a tyi'u ti' ngu' ji'i ngu' ti'i, cha' ta ngu' na nu lyiji ji'i ngu' ti'i bi'. ¹⁹Jua'a ti caca culiya' ngu' slo ycui' Ndyosi xqui'ya cha' tso'o nu ngua'ni ngu' ca nde, xqui'ya cha' ngusñi ngu' cha' tso'o ji'i ycui' Ni. Ná nga'a cha' tye chalyuu ji'i ngu' bi' li'.

Chaca tya cña nclyo Pablo ji'i yu

²⁰Lo'o nu'u Timoteo, cua'ni tyaca'a nu'u ji'i cha' nu ntsu'u cha' culu'u nu'u ji'i ñati cuentya ji'i ycui' Ndyosi. Ná taquiya' nu'u tsiya' ti ji'i cha' cuxi nu nchcui' nu ngu' cuiñi bi'. Jlo tsa ti' ycui' ca ngu', jua'a nti' nu ngu' cuiñi bi'; pana ná nda ngu' bi' cuentya tsiya' ti ñi'ya laca sca cha' liñi. ²¹Ntsu'u ngu' nu jlya ti' cha' cuiñi nu nchcui' ngu' cuiñi bi', pana juani nga'aa ndya'a stu'ba ngu' bi' lo'o ngu' tya'a ngusñi na cha' ji'i ycui' Ndyosi.

Ña'a ti cua'ni ycui' Ndyosi cha' tso'o lo'o nu'u. Jua'a caca cha' lacua.